

PROF. DR. DUŠAN KOGOJ DOBITNIK NAJVIŠEG PRIZNANJA GRAĐEVINSKOG FAKULTETA UNIVERZITETA U SARAJEVU



Slika 1. Dobitnik priznanja prof. dr. Dušan Kogoj (u sredini) u društvu rukovodioca Odsjeka za geodeziju i geoinformatiku GF UNSA prof. dr. Admira Mulahusića (lijevo) i vanr. prof. dr. Nedima Tune (desno).

Prof. dr. sc. Dušan Kogoj, dipl inž geod. sa Fakulteta za građevinarstvo i geodeziju Univerziteta u Ljubljani (FGG UL) je prvi geodeta koji je dobio najviše priznanje Građevinskog fakulteta Univerziteta u Sarajevu (GF UNSA). Priznanje „Prijatelj fakulteta“ za 2021. godinu uručeno mu je za izuzetan doprinos napretku, razvoju i promociji fakulteta.

Prof. Kogoj je u svojstvu spoljnog saradnika bio dugogodišnji nastavnik velikog broja predmeta na Odsjeku za geodeziju i geoinformatiku. Po doprinosu nauci i univerzitetnoj nastavi, jedan je od najistaknutijih i najsvestranijih profesora geodezije na Građevinskom fakultetu. Kao jedan od ključnih profesora geodezije, svojim naučnim i pedagoškim radom, umnogome je pomogao razvoju Odsjeka za geodeziju i geoinformatiku. U teškim vremenima u kojima Građevinski fakultet nije imao vlastitog kadra za organizovanje nastavnog procesa, profesor Kogoj nije žalio truda ni vremena kako bi nastava iz geodetskih predmeta bila što kvalitetnija i uspješnija. Kao izvrstan i seriozan, ne samo predavač, nego i vrlo aktivan naučnik, istraživač, uvijek spreman da pomogne, D. Kogoj je imao snažan uticaj na brojne generacije sarajevskih studenata, postdiplomaca i doktoranata, koji su mu se divili i veoma ga cijenili.

Uspješna saradnja i prijateljske veze Odsjeka za geodeziju i geoinformatiku GF UNSA i Odsjeka za geodeziju FGG UL traju u kontinuitetu dvije posljednje decenije, pri čemu je glavnu ulogu u uspostavljanju te saradnje imao profesor Kogoj. Prijatelji iz Slovenije dali su značajan doprinos napretku i jačanju kadrovskih, naučnoistraživačkih i nastavnih aspekata djelovanja Odsjeka za geodeziju i geoinformatiku. S pravom se može reći da je prof. Kogoj, skupa s nekolicinom kolega sa FGG UL, u velikoj mjeri zaslužan što se Građevinski fakultet u Sarajevu, unatoč velikoj konkurenciji, čvrsto etablirao kao vodeća visokoobrazovna i naučnoistraživačka institucija iz oblasti geodezije i geoinformatike u BiH, pri čemu je značajno povećana njegova međunarodna vidljivost i prepoznatljivost.

Profesor Kogoj je uvijek imao mnogo razumijevanja za probleme nastave. S ogromnom energijom je kao mentor diplomskih radova vodio veliki broj studenata koji su studirali geodeziju na Građevinskom fakultetu u Sarajevu po predbolonjskom nastavnom planu i programu. Pod njegovim mentorstvom su mnogi studenti drugog ciklusa studiranja po bolonjskim principima uspješno okončali svoje završne radove na Građevinskom fakultetu. Smatra se izrazito važnim napomenuti njegov predan rad sa kandidatima kojima je bio mentor pri izradi doktorskih disertacija, a koji su danas nastavnici Građevinskog fakulteta.

Skupa sa kolegama Odsjeka za geodeziju i geoinformatiku GF UNSA učestvuje u brojnim naučno-istraživačkim projektima. Kao rezultat te uspješne saradnje nastao je znatan broj naučnih radova, objavljenih u uglednim svjetskim časopisima.

Ovdje se naglašava i zasluga profesora Kogoja, koji je kao rukovodilac Odsjeka za geodeziju Fakulteta za građevinarstvo i geodeziju Univerziteta u Ljubljani, obezbijedio vrijednu donaciju geodetske mjerne opreme Građevinskom fakultetu u Sarajevu, prijeko potrebne u svakodnevnom praktičnom radu sa studentima geodezije i građevinarstva. Ovom donacijom značajno su povećani materijalni kapaciteti Odsjeka za geodeziju i geoinformatiku za izvođenje praktične terenske nastave. Spomenuta oprema od velike je važnosti, naročito za studente prvog ciklusa studija, jer je konačno omogućen praktični individualni rad s modernim elektronskim instrumentima već na prvoj godini studija. Vrijedna donacija geodetske opreme je u velikoj mjeri doprinijela poboljšanju kvalitete studiranja na Građevinskom fakultetu, u kontekstu ovladavanja studenata rukovanjem geodetskim instrumentima i izvođenjem terestričkih geodetskih mjerenja. Zahvaljujući njegovoj inicijativi, predanom radu i velikoj pomoći, u holu Odsjeka za geodeziju i geoinformatiku Građevinskog fakulteta danas se nalazi stalna tematska izložbena postavka starih geodetskih mjernih instrumenata, različitih predmeta i dokumenata, nazvana „Geodetsko naslijeđe Bosne i Hercegovine“. Pažljivo osmišljena postavka obuhvata mnogobrojne zanimljive eksponate i predstavlja jedinstven primjer očuvanja tehničkog naslijeđa ne samo u BiH nego i u regionu, pružajući posjetiocima jedinstven doživljaj kroz ostvarivanje neposrednog kontakta s bogatom geodetskom prošalošću.

S Dušanom Kogojem, izuzetnim čovjekom i prijateljem, nastavljamo uspješni put izgradnje našeg Odsjeka za geodeziju i geoinformatiku. Hvala mu na svemu što je učinio i onome što će još učiniti za nas u Sarajevu i BiH.

Admir Mulahusić